

Protocol fat bun da la radunanza cumünala dals 16 december 2010**Protocol no. 10**
Radunanza cumünala dals 7 october 2010, 20.15 – 22.50

Preschaintas: 31 personas

S-chüsats: Marianne Werro, Jon Peder Benderer e Jachen Andri Schmidt

Il capo constata cha la radunanza saja gnüda convocada in basa a nossa constituziun el dumonda sch'inchün haja da far objeczius. Objecziuns nu vegnan fattas ingünas.

Protocol

Il protocol no. 9 da la radunanza cumünala dals 16 settember 2010 vain approvà.

1 7 AMBIAINT E PLANISAZIUN
Orientaziun – Promoziun 1. abitaziuns e direcziun 2. abitaziuns

Il schef da fabrica orientescha cha quist saja la terza sairada d'infuormaziun e discussiun a regard la promoziun da 1. abitaziuns e la direcziun da 2. abitaziuns. El cumainza la sairada d'infuormaziun cun ün'introducziun per rinfrais-char ils puncts essenzials da la ledscha. Daspö l'introducziun d'üna zona da planisaziun cul böt manzunà survart cun data dals 11 mai 2010 sun gnüdas fabricadas marcant daplüssas abitaziuns cun l'adöver da 1. abitaziun.

I segua ün'animada discussiun cun divers votums, tanter oter ils seguaints:

- Ün votant fa la proposta da 30 % (impè da 33 %) per la quota da 1. abitaziuns.
- Tenor ün votant manca ün concept general. Per decider sur d'üna chosa uschè importanta saja important da savair sco chi sta culla realisaziun d'üna zona per indigens. Tenor el as concurrenzeschan ils duos affars ün cun tschel.
- La ledscha es cumplichada e per controllar ch'ella gnia eir executada inandret daja daplü lavur per l'administraziun da fabrica.
- Las investiziuns da la part energetica pon gnir trattas giò da la differenza da las valurs novas avant e davo il fabricat e quai es pro lavuors da renovaziuns üna gronda part da l'investiuziun. Ün votant manaja però cha'ls 10 % sajan massa bass ed chi's crouda fich svelt aint l'oblig da pajar la taxa directiva.
- Tenor ün votant as stess reglar la chosa regionalmaing (p.ex. tras la PEB).

Quistas remarchas davart da la populaziun piglia il Cussagl cumünal incunter. El s'es consciaint chi da adüna amo pussibilitats da megliorar, però el pensa cha la proposta preschantada saja bain ponderada e pronta per la votumaziun. Las propostas vegnan però amo üna jada examinadas. I vain orientà cha la ledscha saja expost public dals 23 settember 2010 fin als 25 october 2010. L'object da revisiun es la promoziun da la fabrica d'abitaziuns principlas e la direcziun da la fabrica da seguondas abitaziuns. Minchün ha il dret d'inoltrar propostas ed objecziuns in scrit a man dal Cussagl cumünal. La votumaziun a l'urna ha lö als 28 november 2010.

2

VARIA

Rimplazzamaint lingia d'aua Spinatscha – Tuols

Ün votant remarcha cha la lavur d'indschegner per quel proget saja pajada cun fr. 31'000.-- massa bain. El vess gugent da survgnir il maniamaint davart da la cumischiun sindicatoria e da la radunanza cumünala. Il capo orientescha cha quista lavur saja gnüda surdatta tenor las normas da la SIA e cha'l Cussagl cumünal haja decis da scumpartir las lavuors d'indschegner d'ürant l'on süls trais büros chi han lavuraint domiciliats a Sent sainza trar aint mincha jada offertas da la concorrenza.

L'actuar: